




Early European Books, Copyright © 2011 ProQuest LLC.  
Images reproduced by courtesy of The Wellcome Trust, London.  
304/A






Early European Books, Copyright © 2011 ProQuest LLC.  
Images reproduced by courtesy of The Wellcome Trust, London.  
304/A





Early European Books, Copyright © 2011 ProQuest LLC.  
Images reproduced by courtesy of The Wellcome Trust, London.  
304/A




Early European Books, Copyright © 2011 ProQuest LLC.  
Images reproduced by courtesy of The Wellcome Trust, London.  
304/A

8° 31 437  
1/4 127 230


N VI. 8 17

K 304/A









7006 15  
TURRIS  
BABEL

*SIVE*

Judiciorum de Fraterni-  
tate Rosaceæ Crucis

CHAOS.



ARGENTORATI,

sumptibus hæredum LAZARI ZETZNERI.

ANNO M. DC. XIX.

*Henricus Heinicus J. C. Rostochiensis  
rara devotionis exemplum, cui Turris Babel  
inscriptus, vid. Vita J. V. A. p. m. 58.*





*Viro Clarissimo,*

**D. HEINRICO**  
**HEINIO ROSTOCHI-**  
**ensi U. J. D.**

*Amico in Christo exoptatiss-*  
*imo, S.*



*IDE OPTIME HEI-*  
*ni, quibus rationibus con-*  
*tra Fraternitatem illam*  
*invisibilem utar, Famâ*  
*scilicet contra famam.*

*Interim multas ineptias evitavi, quas,*  
*ne, nihil agerem, huc connotavi. Non,*  
*satis feci, quod scio, multorum obje-*  
*ctionibus: sed ne hoc quidem facere*  
*volui: id potius ago, ut tibi & amicis a-*  
*lijs consensum meum aperiam, simulquæ*  
*alijs ostendam, quomodo affectum in hac*  
*re vehementiorem effugerim. Veritate*  
*nunquã contradixerimus, quæ, vel nullo*  
*alio teste in Verbo DE Immoto prostat.*  
*Ordini autem alicui nondum satis per-*  
*specto, nondum explorato, nondum exa-*

**A 2**



minato nomen dare, nemo persuaserit.  
 Pessima quæq<sup>3</sup> bonitatis famam habent:  
 optima quæque malignitatis infamiã.  
 Si mala circa nos sunt, amplectamur il-  
 la bona, quæ non desunt: & seculo hoc  
 nostro admirabili ita utamur, ne absur-  
 da noceant: sed fruamur certioribus, atq<sup>3</sup>  
 rationabilioribus. Feci ingenuè, quod  
 potui, & inter tot conijcientes conjectu-  
 ram meam addidi. Quæ si delinquit,  
 quid mirum, cum hodie tot fallantur &  
 fallant? Christuste sibi ab omni errore  
 servet, ac nos in se & ad se jungat! Vale  
 cum amicis nostris, ac iterum salve.

à Tuo

J. V. A.

J. Fama.

*Fama.*

VIESCITORBIS,  
 otiantur homines, & in-  
 concinnis fabellis tem-  
 pus conterunt: ego quid  
 ago, ludibriorum omniū  
 parens, ne agā nihil? itane defecit illud  
 rumorū copiae cornu, ut nihil sit, quod  
 hoc strepero foro in vulgus & turbam  
 dispergā? Euge verò, quam sese offert  
 lepida materia, qua hiantia mortalium  
 ora impleam, & intima desideriorū pe-  
 netralia eliciā. Placet, stat sententia, sic  
 agam. Ehem Mortales, quotquot reli-  
 gionum dissidia, & politiarū dissona, &  
 literarū tenbras, & morū dissolutionē  
 & humani generis compedes agrè in-  
 tue mini: quod felix fortunatumq; orbi  
 terreno sit, adsūt in procinctu innume-  
 ri *Fratres* multiscij, multipo-  
 tētes, piissimi, probatissimi, sub *Rosae*



*Crucis* symbolo uniti, qui dudum concepta optimorum quorumque vota supra vota adimplebunt, & terras vestras ab omni Idolatria, Tyrannide, Barbarie, & impuritate liberabunt: humano generi decus suam restituent: & perfectam aliquam ac florentissimam Monarchiam ex meritis piis, bonis, & eruditis constituent. Quos si, uti decet reverenter exceperitis, beatos, ô beatos vos divites, sanos, sapientes, longæ vos futuros, atq; invictos! sin imprudenter & impudenter rejiciatis, infelices, heu infelices vos! quibus fœdâ morte erit intereundum. Nequid verò dubitetis, en vobis *Ordinis* admirabilis historiâ, & *primi patris* icona, ne quid metuat, en *Confessionem* religiosissimam, omnia inusitato stylo, & loquendi ultra humanam formam exhibita. Legite, dijudicate, imò fores pandite, & adventantem felicitatem conveniente applausu excipite. Feci, quod iussa sum: vos, quod debetis, quodq; expedit vobis, facite: Valet. Fallor, an hominibus hanc prægrandem fabulam persuasi! murmurant

rant nescio quid, & capita conferunt: mihi foro cedendum est, ne vel examiner scrupulosius, vel, quod omnite-  
monio caret probare cogat. Vos in-  
terim, si quid ludicri hæc Comædia da-  
bit, animis adeste, & auribus.

## I I.

*Curiosus, Supinus, Sollicitus.*

**C.** Quid hoc est, quod audio? Su.  
• Quasi id nostra referat? C. Heu  
nostra, religionem, politiam literati-  
ram purgatum iri? quod tam anxie ex-  
petimus. Su. Non vacat omnibus su-  
surreptis aures præbere. Viderint nostri  
primates, quid rerum agatur. Cur. Hoc  
potius deceat civem bonum, stare in  
excubiis, & singulos quasi introeuntes  
& exeuntes annotare, observare ge-  
stus, pensitare verba, examinare mer-  
ces, ut quid Reipublicæ de unoquoq;  
sperandum, metuendumve sit, id ex-  
actè referre possit. Su. Vah laborio-  
sum vite genus, ubi in alieno te atteras,  
tui obliviscaris! quin potius ut quam



minimè, quibus eges, emas: quàm maximo, quibus abundas, vendas, id cuas, & domum tum ære, tum cibo, nō nugis onustus redis. Cur: Videris mihi humanæ voluptatis medietatem ignorare, quæ vere condimentū reliquæ partis dicitur: scire nempe, quid rerum hinc inde in orbe agatur, quid hoc mirabile seculum secum vehat, quid posteritati exp. ctandum, quibus de rebus, dum inter nos conferimus, quid nisi delicatissimè vivimus? Sol. Ecquid inter vos est dubij? Su. Ineptulus ille, nescio quàm procacem feminam audivit incredibilia narrantē, quibus jam mirè agitatur. Cu. Incredibilia verò? Esse *fratrum* aliquem *ordinem* qui *reformationem orbis* meditetur, cumq; ad hanc rem ingenio, opibus, viribus instructissimum: Jam in acie stare, jam alicubi visum, jam minas exauditas, non movear? Sol. Audivi & ego hanc narrationem, quam tamen haud maximi facio, nisi quòd Sathanæ artes semper metuendas pudarim, qui ex qualibet, quantumvis minimâ re occasio-

occafionem impofturarum fumat: quibus fi non noceat Ecclefia, illud attamen, & mille artificem fe oftendat. Su. Tanti mihi hæc res non erit. Cu. At ego in eam diligentius inquiram. So. Oremus potiùs Chriftum noftrum, ne quid contra nos Sathan vel ferio poffit, vel joco. Nam cum Chrifto, feria Sathanæ joco Fidei erunt: fine Chrifto quævis jocofa fecuritati noftræ nimis feria.

## I I I.

*Scrupulofus, Securus, Prudens.*

**S**crupul. Vix fomnum capio, ita me angit fratrum ille exercitus, quem aiunt effe fupra Xerxes, aut Tamerlani copiofiffimum. Quid agemus, fi ijs fortè Religio noftra, fi Reipublicæ ftatus, fi literarum profeflio displiceat, an intereundum nobis erit? Se. Itane infanis, ut putes ad nos ufque hoc fivè malum fivè bonum pertingere poffe: alij funt obices, alia impedimenta, quæ

A 5



non sinent nos obrui: Interim nostra  
agamus. Se. Nescis tu, ah nescis, quā  
facile hoc *Reformationis bellum* susci-  
piatur, quā deponatur difficillimè.  
Se. Vah! si quid universale meditan-  
tur, habebunt, quod in Mahomete, &  
Papa laborent: quos dum depugnant,  
liberū nobis erit, de salute nostra con-  
sultare, Sin aliquam & nostram for-  
tasse orbis partem tantū aggredian-  
tur, optimum est potentissimo hosti  
nos dare, expectare leges novas, atque  
sub recentissimo imperio obedientes  
& pacate vivere. Sc. Rides tu? at  
ego ringor, cui jam sanguinis torren-  
tes, & tristissima orbis secum confli-  
turi facies in oculis est. Quis enim  
dubitet, sine atrocissimis certaminibus  
rem tantam, nimisq̃ue exacerbatos a-  
nimos componi iterum posse? *Secur.*  
Vix dixero, cur me hæc cura minimè  
tangat, nisi quod soleo rem prius co-  
ram intueri, dein mihi prospicere, non  
moyeri famā vel rumusculis. *Prud.*  
Nōne & vos *fraternitatis* illius fama  
dividit? *Scr.* Ut quā maximè: hīc  
enim

enim rem usque adeò periculosam & momenti maximi negligit. Pr. Tu verò minis tantæ molis cruciaris? nōne? Sa. Utique. Sic enim decet, qui rebus præsentibus optimè vult. Pru. Laudarem sollicitudinem tuam, si quid veri simile reformidares: nunc quia etiam monstrosa hæc, & ut ita dicam, lemures metuis, nescio an te potius torqueas, quàm aliquod Reipubl. periculum prævideas. Unde si quis ad tua monita assurgat, & fores adventanti hosti occludat, nullo dubio paulò post rideretur, si constaret, unicâ recitatione hanc tibi trepidationem injectam. Sec. Itaque in utramque ego aurem dormivero. Pr. Memineris tamen, prudenti sagacitate multa evitate, securo contemptu plurima esse deperdita. Se. Abeo, ut lectum sternam. Sc. Abeo, ut arma parem. Pr. Abeo, ut familiam curem, ne quid hac obstantiâ honesti officij intermittatur.



*Mobilis, Immobilis, Sequens.*

**M** Hem illud tandem est, quod volo: nunc vixisse demum iuvat, nec sub pulvere majorum nostrorum fuisse elatum. Im. Iterum tu loco emo eris tuo, quam nunquā pœnituerit. M. Quis non evolet hoc tempore, ubi alæ dantur, & cœli propemodum aperitur commerciū? quis non relinquat sordes suas, inter quas hæctenus laboravit. I. Nōne quod paulò antè forduittibi, subinde desideratum iterū est: & quæ quondam intollerabilia accusata, post triduum excusationem, vel laudem etiam invenēre. M. Non pudet, ut annis, ita rerum veriore æstimatione crescere, ne dum rem planissimè perfectissimam admittere. Quid enim, quid inquam, si post hac nihil errare, nihil indigere, nihil ægrotare, nihil nescire, nihil laborare, nihil canescere opus erit, nōne vel per errores eo emeruisse allubescat? I. Hic sum, quo  
me:

me loco Natura reposuit, ubi interdum  
declinem, interdum egeam, interdum  
morbos, ignorantiam, fatigationem,  
delirium etiam patiar necesse est, cui si  
relucter, suaviter fortasse fabulari apud  
me liceat, nunquam vel latum unguem  
mea sede egredi, quæ tum demum mi-  
hi non molesta erit, si non arbitrij mei  
volubilitate, sed sati immobilitate ac  
decreto æstimem. S. Pax vobis! M.  
Ea jam imminet. Im. Ea semper me-  
cum fuit. S. Neutrum capio. M.  
Eh o an tu nescis *Orbis ad hæc pacificato-  
res?* S. Et tu hoc somnium etiam so-  
mnias? M. Non te pudet dicere so-  
mnium, quod tot Vigilantij per Europam  
astruunt, quod singulis Nundinis ve-  
lut clara tuba classicum canit? S. Ah  
te misellum, qui restuas, non sanè into-  
lerabiles, linqvis, & ad novas nondum  
exploratas aures arrigis, vel veriùs car-  
ne ex ore dimissa umbræ inhias! M.  
Nihil ergo supra aut ultra consuetudi-  
nem admitteremus? S. Utique; sed  
non nisi ea, quæ candidè nobis oblata,  
cum nostris conferri, & deprehensa re-



rum, si fas est dicere, melioratione accommodari rebus possunt. Secus verò fit, si quæ verbis tantum, & intricatissimis gryphis constant statim pro oraculis & res summas continentibus admittamus. M. Itaque tu nomen huic Ordini non das? S. Dederò, si meliorem nobis videro. Im. At mihi, quæ non mala, bona sunt. S. Nescis tamen, multos, nimiam immobilitate suâ, renatâ luce, sibi & tenebris suis relictos esse?

## V.

*Astrologus, Calculator, Con-  
jectans.*

**A** Hic nempe erat magna illius • *conjunctionis* partus, ut novis Prophetis exorientibus, qui mores veteres alterarent & religionem conspurcatam rectificarent, Papæ & Mahometis tyrannidem labefactarent, ab ipso cælo nobis incidarentur. Quid enim bone Deus! non admirer in dispositione cæli ad 20. Decembr. h. mer.  
**Anni**

Anni 1603? quæ tam clarè & distinctè  
singula *fraternitatis* illius Regiæ be-  
neficia & juramenta notat & exprimit,  
ut mirandum sit, superesse, qui de ea  
dubitent. Cal. Mihi quidem Cœlica  
illa literatura ignota est, sed certiore m  
in Naometria mea habeo, quæ jam du-  
dum mysticis numeris Hierosolymæ  
restorationem, Babylonisque ruinam  
evidenter prodidit. Quibus nunc Ro-  
sei illi & sancti *fratres* conveniunt,  
admirabili sanè consensu, ut illos ipsos  
esse dicamus, quos Abbas Joachimus,  
S. Brigita, Liechtenbergius, Paracelsus,  
Postellus, & illuminati alij, terris pro-  
miserunt. Con. Nunquam minùs de  
arte utriusq; vestrum sensi, quàm hoc  
tempore, quo video enormiter vos  
peccare posse. Nam dum tu *Astrologe*,  
cœlum ad hanc fabulam violenter ro-  
tas, & falsa etiā ibi consignata adstruis,  
quis non in verisimilibus tibi fide me-  
tiam deneget? tu verò calculator, cū  
te hætenus propemodum Prophetam  
jactitaris, & ultimæ ac maximæ com-  
motionis Principes, nunc hunc, nunc  
illum.



illum, nunc aliquem alium, uti scilicet unus vel alter eminebat, deniq; fictitiam, ni fallor, fraternitatem constitueris, omnino suspicionem mihi dedisti, vanissimam aliquam & inanem tuam calculationem esse. *Astrol.* O frontem! cœli manifestissimas prædictiones negare? *Cal.* O os! certissimis numeris contradicere? *Con.* Cœlo nihil negaverim: tibi verò succenseo, qui mendacia etiam in cœlo legis. Ita sanctos numeros suspicio: sed quos ad hos *Cruciatos* nihil pertinere suspicor. Conjicio autem neque per cœlum, neque per numeros, hanc fabulam ab ingenioso aliquo excogitatam, qua curiosulos irretiret, Prophetas examinaret, hiantibus illuderet, deniq; de impostorum, si qui se actioni admisceant, malignitate ac impudentiâ certus esset, ac exinde inter mortalitatis crepera, cautior ambulare posset. *Astrol.* Væ mihi! si cœlum fefellit. *Cal.* Heu mihi! si numeri decipiant. *Con.* Benè vobis! si vel fabula vos veritatem tandem edoceat.

## VI.

*Querulus, Defensor, Con-  
fitens.*

**Q**uerulus. Metus erat, si nos porro  
acer. mus, locuturos lapides. At  
nūc quā oportūnē intervenit veri-  
tatis & libertatis illa vindex *Fraternitas*  
quę nullo ullius hominis respectu mo-  
ris vitiosos inclamat, & remedia singu-  
lis nostris malis promittit! *Def.* Sem-  
per tu ævū hoc nostrum accusas, quasi  
nunquam pejus fuerit, imò quasi non  
idem fuerit semper. Non utique diffi-  
cilis Mundus est: sed tu impatiens, cui  
etiam bene constituta displicent, & sa-  
pidissima faciunt nauseam. *Defen.* Heu  
duam sortem, pati ac si nūl increpari!  
vapulari & rideri! quid? nōne Zi-  
zania frequens est in agro Domini?  
nōne spinæ obsipant iustitiæ folium?  
nōne lolium opinionum obtegīt ca-  
thedras? nōne viticæ dissolutionis oc-  
cuparunt societatis humanæ hortulos?  
Et laudemus adhuc Mundum? excu-  
semus?



semus? imò feramus, & audiamus. *De.*  
 Quàm iniquissimus es! Tempus, quo  
 Evangelij lux refulsit, Politiarum com-  
 positio restituta, literarum faces accen-  
 sæ, & elegantia omnes terræ quasi  
 redditæ sunt, tu malum & durum ap-  
 pellare audes! dignus equidem, qui  
 vel Antichristi verbis, vel Turcicis ver-  
 beribus, vel Barbaris vepribus coher-  
 cearis, ut tum demum æstimare seculi  
 hujus felicitatem incipias, cùm supe-  
 riorum infelicitatis aliquam partem de-  
 gustaveris. *Con.* Fallor, an hic est ali-  
 quis, cui Mundus placet? *Quer.* In  
 tempore ades, ut hunc increpemus, qui  
 usque adeò comptulos nos ait, ut nihil  
 illis perfectissimis *fratribus* opus ha-  
 beamus. *Con.* Miseros nos, si expec-  
 tandum sit, dum illi Mundo invete-  
 rato juventutem reddant! *Quer.* Eho!  
 an tu dubitas, tandem adesse, quos tot  
 nostræ querelæ excitarunt? *Con.* Quæ  
 illæ querelæ? *Quer.* Obstupesco!  
 quasi in singulis vitæ ordinibus desit,  
 quod accusamus, desideremus, incre-  
 pemus? *Con.* Sunt equidem infinita,  
 quæ

quæ hanc vitam nostram imperfectionis convincunt, & ad perfectionem illam, quæ in cœlis est, aspirare stimulant: sed nequaquam vel Deo gratum, vel homini decorum, perpetuis querelis, & Mundi insectationibus vitam absumere potius, quàm Fidei & patientiæ exercitiis. *Def.* Habēsne, cur in hoc Mundo acquiescas? *Quer.* Nondum. *Con.* Sed nec Deus unquam sinat, ut in hoc vanitatis emporio quicquam nobis solidè satisfaciat, aut animum expleat: quin potius certi simus, omnia hîc vitium suum aliquod habere: sed quod vir bonus ac prudens semover, declinat, evitat, aut certè ita admittit, ne simul animæ suæ vitiū adferat. *Def.* Vivamus, dum vivimus. *Con.* Ita tamen, ne post hanc vitam æviter nū nobis moriendum sit.

## VII.

*Ciniflo, Agyrta, Philosophus.*

**C**iniflo. Desperare potuissem, nisi Chymicus essem. Nimis enim *Natura* sese subduxit diu, nimis elusit artifi-



artificia mea sæpè. Nunc, quod bene  
vertat, captivam tandem eam habet il-  
la Macrocosmi obstetricia *Fraternitas*,  
quam in vinculis suis intueri g. stio.

*Agyr.* Quis ille *Carbonarius*? *Ciniflo.*  
Fallor, an etiam hic Naturæ aliquod  
deliciolum intueor? *Agyr.* Quòd imus,

ô bone? *Cin.* Si quidem pergamus,  
ad Beatitudinis regiam. *Agyr.* Atqui

inde ego exeo. *Cin.* Tunc Regiam  
videris? *Agyr.* Ego non viderim, qui  
haud paucis septimanis *Fraternitati* il-  
li hospes & convictor adfui, quæ ex  
meris purisque Regibus constat? Vidi

palatia plùs quàm Imperatoria, vidi  
gazas Crœsi majores: vidi, quid verò  
vidi? audivi, inquam, Musicam planif-  
simè olympicam. *Cin.* Crediderim.

Nam & mihi cùm duo nuper *Ordinis*  
*Fratres* seniores adfuissent, & de *trans-*  
*mutatione metallorum*, ac ipsissimo et-  
iam *Azoth* satis prolixè mecum contu-  
lissent, omnia visa sunt regia, Cæsa-  
rea: usq; adeò *aurum* nihili faciunt: &  
*massa* haud credibilis ponderis ad pe-  
des meos abjecerunt. *Agyr.* Nónne

verò

verò id aurum tuâ præsentia fabrefactum erat? *Cin.* Maximè, ac, quod magis mireris, ex nullo subjecto alio, nisi aëre, quem condensatum, & benedicto pulvere tinctum in orientale aurum transmutarunt, facturi vel integrum hypocaustum aureum, si admissem.

*Agyr.* Ferendum id erat. *Cin.* Haud ædepol, si sapimus. quis enim nos Magnatibus eripuisset, si res innotuisset? *Agyr.* Potuissent iterum in aerem omnia resolvi.

*Cin.* Nescistu, nos aureum in minimis habere, neq; seriò indagare: sed delectari potius *Universalis* aliqua *Magnesiâ*? *Agyr.* Apparet. Nam rarissimè auro conspicuus es, fuligine semper, fabulis inseparabiliter.

*Cin.* Etam maledicis, sycophanta?

*Agyr.* Sic decet hominem, qui societati illi magnificæ non displicet. *Phil.*

Egregium par! quod mendacijs vivit ipsum, & alios pascere satagit. Hem

tu Chymice, acquando fidem liberas?

*Cin.* Ut me cælum & terra amet, mente citius. *Phil.* Unde cembri, opinor.

Non te pudet, toties etiam juratum esse

menti-



mentitum? non te pudet, tot jactantias resorbere? *Cin.* Nunc demum illa, illa, illa Fraternitas dabit finem.

*Phil.* Fun: m citius, quo omnino dignus es, qui & ætatem tuam, & nummos, & alienam credulitatem, deniq; omnem conscientiam concoquis. *Ag.*

Hic homo planè incredulus est. *Phil.*

Itane etiam tu superstes es, nec pendes, qui naso, quotquot curiositatis aura delectantur, suspendis? *Agyr.* Audiat hæc augusta fraternitas, & ulciscatur!

*Cin.* Prodeataurea fraternitas, & indociles hos coarguat, ac convincat!

*Phil.* Hoc vos sanè decet, ut, qui toties fumos vendidistis, *Fraternitatis* illius *Caminarij* communi consensu eligamini.

## VIII.

*Mendicus, Impostor, Animadvertens.*

**M**endicus. Bene sit vobis, ubi ubi estis, *Ros cruciferi Fratres*, quorum beneficio minùs esurio, & rariùs!  
Nam



Nam cum jam nihil ultra esset, quod  
 delicatiorum palato superest, *Fama*  
 vestra, & *Famae* continuatores acue-  
 runt iterum ac irritarunt gustum. Nunc  
*Echo, Pandora, Clypeum, Fortalitium,*  
*Silentium, Speculum,* & quæ alia urbis  
*Utopia* phantasmata sunt, apud filios  
 disciplinæ, & arcanorum socios magnâ  
 intromissionis facilitatem, susceptio-  
 nis promptitudinem, alimentationis  
 liberalitatem conciliant: quibus dum  
 ego lepidarum recitationem & relatio-  
 num condimenta addo, parum abest,  
 quin in media mendicitate ditescam.  
*Impo.* Dum mundum peragro, *Rasi-*  
*crucigerorum* sive coadiutor, sive nota-  
*rius, sive emissarius, sive conquisitor, sive*  
*questor,* nescio an plures viderim cre-  
 dulos, an dubios, an obstinatos: usque  
 adeò orbis tripartitus est. *Men.* Sal-  
 veto, vir optime, &, quod conjicio, in  
 rebus tertij status non peregrine. *Imp.*  
 Scintu, cum quo loquaris? *Men.* Viro  
 aliquo quantivis precij. *Imp.* Hoc  
 rectè quidem: sed memineris, esse *Phi-*  
*losophum, Philologum, Theologum, Theo-*  
*sophum*

*sophum, Medicum, Chymicum, Eremitam, Fraternitatis invisibilis Coadjutor, Antichristi hostem intractabilem, & quod ad rem maximè facit, etiã Poetam. Men. Papæ, quàm itaque tibi & licet, & facile est fingere! Im. Non lubet joculari, cùm ad seria natus sim. Tibi hoc edico, ne quid temerè resistas Friderico Barbarossæ ultimæ phalangis in terris Imperatori, jam ocreato, jam pranso, & ex Tyrolis abditis emergenti. Men. Cohorresco. Imp. Id magis diceres, si mecùm fuisses intuitus arma ex adamante, gladios ex carbunculo, omnia ferramenta ex auro. Men. Illè ne solus, an cum ipso alij quidam? Imp. Quidam, ais? imò mille myriades sub diversis Ducibus Caloro Burgundo, Balduino Flandro, Merlino Anglo, Danheusero, & innumeris alijs. Ani. Itane nulla compita ab hac hominum fece immunia sunt? En alterum petacem, alterum mendacem. Men. Te ipsum optaveram, ut primùm inusitatorum libellorum copia mihi: sed haud minimo facto est. Ani. Apage illas  
tuas*



tuas nugas, quibus rectum ingenium,  
velut tabaci fumo opples. *Men.* Cave  
hoc dixeris: nescis, à fraternitate aliqua  
me habere? *Ani.* Illane, sub cuius lar-  
va, quisquis maculare bonos, ridere in-  
tegros, fallere simplices, spargere te-  
meraria non dubitat, prodire incipit?  
*Im.* Perge, perge, sanctiss. Fraternitatis  
innocentiam vindicare. *Ani.* Hoc tuum  
erit, qui jam longo usu ex omni mate-  
ria mendacium, quam ex luto ollam  
Figulus, fingis facilius. *Imp.* O inju-  
riam in pietatem meam! *Ani.* Eam  
nempe quæ ex omnibus Religionibus  
conflata, ex omnibus opinionibus cõ-  
suta, ex omnibus vanitatibus congesta,  
id unum ad paucissimas horas probat,  
quod ventrem saturat: mox verò in o-  
mne maledicendi & calumniarum ge-  
nus resolvitur. *Imp.* Abeo. *Ani.* Hoc  
unum prudenter agis, quod un loco  
non diutiùs immoraris. *Men.* Nec li-  
bellos meos inspicias. *Ani.* Cùm  
optimas horas pessimè per-  
dere libuerit.

B



*Hypocrita, Impius, Pœnitens.*

**H***ypocr.* Nescio, an unquam curiosiores fuerint homines, quàm hi nostri, qui omnia examinant, omnia introspiciunt, omnia evolvunt, ut vix posthac apud te habitare, & interniregni solus esse conscius possis. Præterea vitam usq; adeò scrupulosè instituunt, ut vix ridere ultrà, edere vel bibere nobis sint permissuri, quasi ante nos nemo personam suam egerit, nemo frontem diduxerit. Sed videamus, quid denique hæc Catoniana *Fraternitas* allatura sit tetrici. *Imp.* Non sufficit ergo audire concionum invectivas, & fori morsus, tum exactorum nostrorū tribunitia verba, nisi etiā ordo aliquis novus nobis compedes moliatur, quē ex orco ad subjugandam amplius terram emissum crediderim. *Hyp.* Mirum sanè non est, illos tuos incōpositos mores reprehensionē mereri, sed quod in piam etiā hilaritatem, in liberalē parsi-

parfimoniam, in amicas lites, in honestam licentiam, in compositas relaxationes sibi iudicium sumit, & uno eodemque ore superiores & inferiores, religiosos & prophanos, literatos & illiteratos impetit, planè intolerabilis est.

*Imp.* Meo iudicio nec præconum verbi & legum, nec ducum doctrinæ & morum indigemus, quibus tantum imperare hominibus volupe est, ut jam superaddere illos rigidos censores, insanum sit: quos si admittimus, perditum sumus. *Pæn.* Gratiastibi ago, Clementissime Deus, qui me quoquo modo officij mei admones: sed hem aliquos præsentem. *Hyp.* Nampe & tu intemperiem fraternitatis illius accusas. *Pæn.* Rosæ Cræcis inquis? *Hyp.* Illius certè. *Pæn.* Debeo illi non nihil, quæ aliud agens morum inconcinnorum me admonuit. *Hyp.* quasi eius sit, nobis, quid deceat præscribere. *Pæn.* Tibi sanè nemo hominum leges, quæ placeant dabit, cum ipse tibi numen sis ipse tribunal, ipse veritatis puteus, alioquin nihilo cæteris melior: sed fuca-



tior. Itaque meritò irasceris, quotiescunq; vel tenui sibilo conscientia tua in apertum producitur. *Imp.* Ha, ha, he. *Pæn.* Quid tu rides? *Imp.* Stoliditatem vestram, qui, dum fingitis & refingitis vitam vestram, consenesceitis. *Pæn.* Mihi id Deus det, ut quavis occasione in melius muter, &, quæ malè acta sunt, pudens, ac pœnitens post me relinquam. *Hypoc.* Alia sunt, & alij, qui hæc doceant. *Pæn.* Mihi tamen id notabile erit, usque adeò vitiis vos obritos, ut qua parte fortasse optima est, hæc, ni fallor, fictitia fraternitas vobis displiceat.

## X.

*Scriptor, Lector, Mediator.*

**S***cript.* Non patiar, hanc fieri seculo nostro injuriam, ut Magi aliqui fratres Paracelsici universo, etiam politissimo Mundo obloquentur. Atque en pectinem mecum, en lixivium, quibus purgavi sordida capita. *Lector.* Hic ne ille polygraphus est, literatorum Ter-

minus

*minus*, qui nemini cedit. *Script.* Superest, ut Mundus jam pæana canat, ob devictos turbatores, libertatem restitutam, obq; firmatum denuo Philosophiæ Capitolium. *Leet.* Licetne te alloqui, Philosophorum disertissime? *Script.* Hoc est, quod volo, ut vivus & mortuus tecum colloquar. Sed quid nunc legis? *Leet.* Vah! quid aliud, quam *ultima reformationis* delineationes & schemata, quæ nobis cum illa sapientissima fraternitas communicat? *Script.* Non prohibeo, hæc legas: si tamen perspicilia mea naso adeptes, quæ te introducent ad huius manipuli penetralia. Videbis enim, esse Necromanticos, fanaticos, Münzerianos, Cabalistas, Chymicos, aliasque Reipub. pestes, quas mirum est, nemine prohibente, in media Imperij adyta audere proserpere. *Leet.* Adeone mali sunt, quos ego simplicissimos credidi? *Scr.* Lege hæc mea, & probabis sagacitatem, qua ex tenebris & latibulis suis ego eos extraxi. *Leet.* Jam dolet, imminutam apud me esse eorum autori-



tatem, qui me toties oblectaverant.

*Med.* Præfiscine! Scriptor adest. *Ser.* Jam tibi, opinor, innotuit, quod bellū cum scelerata gente animosè geram.

*Med.* Nescio, quā animosè: cum nec hostem nec adversarium habeas, quā te ipsum: est tamen sui victoria maxima.

*Scrip.* Non tibi probantur meæ conjecturæ? *Med.* Quid agam, cum

neminem fratrem vel audiam, vel videam, vel olfaciam, qui accusationibus tuis conveniat.

*Script.* Itāne sordet tibi cruditio mea? *Med.* Non ædepol:

sed miseret in chimæris & Non-Entibus per tot Andabatarum ictus esse fatigatam.

*Script.* Quid si prodeant?

*Med.* Quid si non prodeant? *Script.*

Quid si mustitent? *Med.* Quid si nuspiam sint?

*Script.* Tum ego ringat.

*Med.* At ego ridebo, præstat igitur inter ancipitia suspendere judiciū, quā cum famæ periculo præcipitare.

*Scri.* Dedi stimulos, qui vel mortuos exci-

tent. *Lect.* Mihi interim jucundum est, vestris altercationibus assidere.

*Med.* Cave tamen ita legas, ut te ex  
bono-

bonorum numero ipse releges.

## X I.

*Otiosus, Laboriosus, Artifex.*

**O**tiosus. Vix patior moram, dum Nundinae adveniant, ut, quid insoliti nobis illa fraternitas parturiverit, resciscam. Nec enim, scio, silebunt toties vocati suppliciter, toties etiam provocati contumeliosè. *Lab.* Heu vitam longam, & artem laboriosam, cuicunque hoc meo exemplo vivendum est. Nam ut vitam extraham, quid non corpori imponendum? quid non vitalitatis atterendum? Ubi sunt vero illi hiatores, & promissores, qui sine fatigatione modo non montes transferunt, & convalles complanant? *Otios.* Quid audio? etiam huic homini fraternitas innotuit? Heus, bone, vir, ecquid fers novi? *Lab.* Id quidem vos otiosos scire par est, quorum laborare est otari: quorum otium labor est. *Or.* Nunquid verò fraternitas artificiosa tibi audita est? *Lab.* Fuere aliqui nu-



per nobiscum, qui immane quos? homines descripserunt. *Otios.* Scilicet volatiles, natatiles, incombustibiles, incomprehensibiles, præter ea, quæ in hominibus summa esse possunt. *Lab.* Ita per Mercurium! nunc dolet nuspiã illos patêre, ut laborem mihi minuant, vel augeant vires. Ajunt enim, posse, quot velint, virorum vires uni infundere. *Otios.* O felix seculum, quod hominem propemodum humanitate eximit, & in orbis terreni imperium restituit! sed quam capessimus viam, ut admittamur? *Art.* Piacet hæc ætas, quæ omnes artes, mirum quantum, exponit, & ut mediæ sæculi lordes excussit, ita ad priscum ævum semper propius appropinquat. *Otios.* Quàm exoptatè in hunc artificem incidimus, cui nullo dubio jam cum illa fraternitate aliquid commune est! *Art.* Quid tu vigilans stertis? *Otios.* Jam paratus sum manus dare, si ad artium illud Roscru-  
cianum centrum conducas. *Art.* Malè sit illis languidis & enervatis manibus, quibus non nisi ineptias con-  
tracta-

tractare libet. *Lab.* At meas callosas non aspernaberis. *Art.* Utinam laboris pertinaciam cum ingenij indagine conjungeres, & oculis sursum etiam, non semper deorsum utereris, satis tibi splendidum & varium hoc artium amphitheatrum appareret, neq; opus foret Amadisianas structuras expetere! *Otios.* Durus es, qui spem auream abscindis. *Lab.* Et ad sudores iterum remittis. *Art.* Sic dabitur, si quisquam fabulas audire, quàm rationis humanæ opera, & Naturæ facilem conversationem experiri maluerit.

## XII.

*Facilis, Difficilis, Tolerans.*

**F***acil.* Ain' verò, omnes hosce fratres dignos suspendio? *Diff.* Etiam rotis, flammis, fluminibus deberi. *Facil.* Quid autem in Repub. turbant? *Diff.* Propemodum omnia. Nam Fidei nostræ fundamenta impetunt. Magistratus auctoritatem convellunt, venditorum famā pessundant

B 5



consuetudines probatissimas tollunt:  
 & quid non sunt aggressi? *Fac.* Equi-  
 dem ex Musca Elephantem facis. Nec  
 enim ego eiusmodi, vel per maximas  
 consequentias, reperio. Potius credi-  
 derim, voluisse aliqua nostra in dubiū  
 vocare non serió, sed disputandi & con-  
 ferendi gratiā. *Diffic.* Nolim ego his  
 disputationibus locum dari, quæ dimi-  
 diam propè hominum partem occupa-  
 runt, ut à seditione parū absumus.  
*Facil.* Bona verba quæso. Quis enim  
 tibi credat, rem in tanto periculo ver-  
 sari, cum nusquam vel minæ appareant:  
 sed satis habeant, semel se mundo ob-  
 tulisse, fortasse non comparituri, si au-  
 diant id tibi tantopere displicere? *Diff.*  
 O unus saltem illorum in manus mihi  
 detur, docerem, quid esset, Antiquita-  
 ris decus impetere! *Facil.* At ego ta-  
 lem aliquem maximo honore affice-  
 rem, & reformandis ædibus meis reli-  
 giosissimè adhiberem. *Toler.* Quàm  
 sumus, bone Deus, dispares! eni lupus  
 cum agno, morosus cum facili, ecquid  
 vobis satis inter vos convenit? *Fac.* Sic,

ut

ut semper. *Diffic.* Quis non ex-  
descat, hodie licere, quod omni ævo  
fuit illicitum, scilicet omnes status hu-  
manæ vitæ in dubium vocare. *Facil.*  
Hic homo mitissimos Fratres de Cruce  
rosea metuit. *Toler.* Quæ nostra ine-  
ptia est, veram liberatam nostrā spon-  
te perdere, dein metuere vincula, & ijs  
succensere! *Diffic.* Quid hoc est? *Tol.*  
Hoc nempe, quòd hoc fraternitatis fi-  
gmentum primò animo intromittis,  
dein cum ipso furiosè decertas: quo  
utroque potuisses abstinere facilimè,  
vel sanè iram differre, dum certius ali-  
quid ea de re constet. Atque ita appa-  
ret, maximum rebus inesse pondus, si  
animum occupent, levissimas è contrà  
& tolerabiles admodum esse, si foris  
corpus tantum ambiant. Mihi certè  
quæ alijs magnæ molis creduntur, xi-  
lia videntur: quæ alios deprimunt, vix  
humeros stringunt. *Facil.* Nunc mi-  
hi magis placeo, qui minùs in hac vita  
angor. *Toler.* Sed noli oblivisci, con-  
similis erroris esse, rebus leviculis de-  
lectari, ac ijsdem onerari, cum id demù



fortissimi hominis sit, rerum humanarum, quæ nunquam de sunt pondera libertatis Christianæ machinis elevare, & robori corporis animæ artem addere.

## XIII.

*Admirator, Contemptor, Aestimator.*

**A**dmirator. Homo homini quantum præstet, nunc de mum intelligo, cum stupenda illuminatissimæ Fraternitatis opuscula lego, quæ, ut ille nihil se scire professus est, ita hanc nihil nescire palam evincunt: usque adeo hominum & priscae & novitiæ dotes in unum collegium confluxisse videntur, & humanitati quinta essentia extracta. *Contempt.* Nunquam ne desines admirari stolidissimam tuam fraternitatem, quæ tot monstra, tot absurda, tot ridicula etiam habet, quot verba, ut ne vigilantem quidem scripsisse opiner: sed somniatorem aliquem sibi & aliis illudentem? quæ narrationis  
con-

confusio? quæ frequens contradictio?  
quæ dissolutio est, ut omnino pateat so-  
cietatis ineptia? *Admirat.* Hæc tu pro  
capto tuo: ego autem accuratius intro-  
spicio, & spiritum sublimiorem olfa-  
cio, qui sub his involucris mysteria  
maxima cōtinet, & artium complexus  
inuitato modo proponat. *Con.* Ju-  
rarim, ne ipsos quidem scriptores se-  
met intellexisse, ne dum gustasse ali-  
quid in abstrusioribus rebus solidi, mi-  
nimè verò id, quod tu divinaris, vo-  
luisse. *Aestim.* Quò magis in hanc  
fraternitatē inquiero, eò mihi lusus vi-  
detur artificiosior. Habet enim nescio  
quàm epitomen humanorum deside-  
riorum, quod erectioribus ingeniis sa-  
livam moveat ea impetrandi, in quibus  
jam dudum defudarunt. Et verisimi-  
le est, ingeniorum concursu sive socie-  
tate, si ea ex selectissimis & perspicu-  
cissimis constet, aliquid tale posse ex-  
hiberi, quod captum nostrum superet.  
Talem verò jam esse, nondum mihi  
persuaserunt, tum quia nimis vel te-  
meraria, vel humilia etiam proferunt.



*Admirat.* Qui fit, amice, quod ægrè te fraternitati subijcis, cui tamen minùs iniquus es? *Aestim.* Quia confictam suspicor, nec nisi ab impudentissimis hultionibus continuatam. *Ad.* Quì possit res tam speciosa, tam etiam cordata fingi? *Aestim.* Quid ni? si ideam qualemcunque credas literariæ alicuius societatis, quæ dotes suas conferat, & artes hinc inde per orbem dispersas colligat. *Admir.* Nihil agis: usque aded me profunda horum eruditio abripit. *Aestim.* Te utique crediderim, at verè eruditos nō item. *Con.* Eant in malam rem, quotquot usitam dedignantur. *Aestim.* Hic morbus tuus est, non iudicium: Mihi verò placeat ingeniorum rariorum lusus etiam introspicere, & dijudicare, quæ rarò ita nugantur, ut nullos ferij conceptus aculeos nobis relinquunt.

XIII.

## XIV.

*Credulus, Susplicax, Exami-  
nator.*

**C***redulus* Jacta est alea. Obtuli me  
Fratribus amplissimis, illumina-  
tissimisque, verè amicis D E I, possesso-  
ribus Mundi, æmulis Naturæ. Au-  
diant, & audiant humilimas meas pre-  
ces, & in extimum beatissimæ societa-  
tis circulum devotissimum clientem  
admittant! *Susplic.* Hem Rosescu-  
cianismi Candiditate meritissime, non-  
dum, nondumne ex Olympo literas  
admissorias habes? *Credu.* Etiam tu  
rides, omnium qui vivunt tuæ opinio-  
nis pertinacissime? Sed memento,  
dum spes superest, satis esse homini ad  
felicitatem aspiranti. *Susplic.* Vah  
quàm suspicor, preces tuas risui fore,  
spem inanem, indignationem certissi-  
mam! quid enim te ferant, quos ajunt  
non nisi optimates terræ suscipere? *Cr.*  
Et tales quidem ij sunt, qui virtutem,  
artes, pietatem, cujuscunque sint or-  
dinis



dinis, colunt. Tales passim alij auditi,  
 & inscripti sunt: talem ego me candi-  
 dissimis literis profiteor. *Suspi.* Quæ-  
 so te, quis tibi fiduciam dedit, ut nun-  
 quam visam, nunquam satis auditam,  
 nedum exploratam societatem divinis  
 propemodum titulis, & summis elogiis  
 ornare, supremam scientiam, perfe-  
 ctissimos mores, cœlicam conspira-  
 tionem ei liberalissimè & cumulatissi-  
 mè tribueres, cùm nondum in propa-  
 tulo sit, quid ea medelæ, aut sciētiae ex-  
 cellentioris rebus nostris attulerit? Fa-  
 cile quippe est infinitam scientiam ja-  
 ctare: rariorem verò aliquam probare  
 difficilius est, quàm mihi animadver-  
 tisse videris. *Cred.* Secutus sum in eo  
 iudicium eruditorum aliquot, qui non  
 erubuerunt suam agnoscere imperi-  
 tiam, nec dubitarunt illorum fratrum  
 inauditam extollere sapientiam. *Exa.*  
 Si bene olfacio, Rosicrucianum quid  
 odoror. *Suspic.* Nihil aberras. nam  
 hic habes hominem oculis sursum ele-  
 vatis, manibus expansis, evolaturum  
 scilicet, si quis det signum. *Exam.* Noli  
 mihi

mihi conculcare optimum virū, quem  
vanitatis humanæ tadium, & tot rerū  
humanarum elusiones abiturientem  
fecerunt. Ego enim spero rebus non  
ex voto succedentibus facilè ad patien-  
tiam rediturum: interim commende-  
mus in eo mali museam, melioris ap-  
petitum, nec lividis suspicionibus inte-  
gritatem eius oneremus. *Cred.* Spe-  
rare liceat. *Suspici.* Ut vinculis his  
exemptus omnifariâ licentiâ exorbi-  
tes. *Exam.* Itāne felix suspicionibus  
es, ut non in singulos dies habeas, quod  
revoces, quod immutes, quod tibi ex-  
probres ipse. Sed bene habet, cum su-  
spicionibus nemini nisi tibi æque mo-  
lestus & importunus sis. Interim cre-  
dulos monebimus, ne quid, cuius pœ-  
nitere vel pudere aliquando possit, sine  
maturo & diuturno examine admit-  
tant.

## XV.

*Audiens, Videns, Crcdens.*

**A**udiens. Jam satis opinor ad fi-  
dem esse poterat, tam constante  
& stre-



& strepera fama de Fraternitate illa mi-  
 rifica admoneri, sed quod tu, cui diffide-  
 re non licet, ipse Fratrum aliquē vidisti,  
 & allocutus es, id quomodo posthac  
 inter homines dubium esse poterit? *Vi.*  
 Ego verò his oculis meis Wezflariæ vi-  
 di, cōtuli cūm homine, obstupui? *Aud.*  
 Non desunt etiā alij, qui historias con-  
 similes adferunt: sed tu mihi instar o-  
 mnium eris. *Vid.* Testor, & ubique te-  
 stabor, rem ita se habere, adfuisse Me-  
 dicū, mira fecisse, linguas calluisse, de-  
 niq; semet Fratrem huius ordinis esse  
 professum. *Aud.* Quid nunc respon-  
 debunt, qui hactenus rem ut inanem  
 neglexerunt? *Vid.* Ipsi viderint: mihi  
 certè anima prope extra me rapta est.  
*Audiens.* Superest, ut diligentius eorū  
 scripta audiamus, pensitemusquē: at  
 mihi nescio quā aliquot insulsi li-  
 belli displicent, velut manifestissimè  
 supposititij. *Vid.* Certè illius erudi-  
 tionem, quem ego vidi, nihil redolent:  
 imò scurriliter potius & cœlo & terrâ,  
 ac innoxiiis aliquibus abutuntur, cæte-  
 ra supra modum biliosi. *Aud.* Quid

autem

autem suades, ut de omni negotio illorum certius aliquid cognoscam? *Vid.* Terram obambulato, si fortè in aliquem fratrem incidas. Nam si eo, ut fertur, numero sunt, vix angulus orbis absque fraterculo erit, si non fratre. *Credens.* Certè is ipse est, quem fama est vidisse Rosierucianum aliquem. Salve, ô beate! *Vid.* Ridesne? *Cred.* Quis te rideat, qui cum Thoma vidisti, & tetigisti? *Vid.* Annè verò ab incredulitate tua liber es? *Cred.* Nondum equidem. est enim ea Thomæ densior, scilicet cui vix decem visiones, ne dum una atque dubia apparitio, suffecerint. *Vid.* De me dubitas? *Cred.* Ita: an non ludibrio aliquo deceptus sis: cæterum integritati nihil derogo. *Vid.* Qui possum vigilans, præsens, intentus. *Cred.* Variæ sunt Satanæ artes, varia etiam Naturæ ludibria, varia artificum & histrionum dexteritas: ego tamen nihil pronuncio, qua arte vel dexteritate morbus depulsus sit. Hoc unum metuo, non satis hunc casum esse, ad destruendam illam occultissimam frater.

mita



nitatem. *Vid.* O lapideam incredulitatem! *Cred.* Potius Christianam Fidem, quæ nec revelationibus, nec recitationibus, satisfidit: sed consensu & testimonio S. Spiritus constat: unde nemini, quantumvis specioso, nisi Deo monitore, se concredit, donec palàm, & in clara luce constet, rem, quæ offertur, aut qua invitamur, ad beatam veritatis concordiam infallibiliter conducere. *Vid.* Credisne, an non credis? *Aud.* Ego hæsito. *Cred.* At ego nemini, nisi verbo Dei, me credere, ingenuè profiteor.

## XVI.

*Deformator, Reformator, Informator.*

**D***Eform.* Qui res omnes ex præscripto & legibus administrant, næ illi mihi nimis abjecti sunt & humiles quin potius vivimus, ut tempori indulgeamus, & quam in partem illud inclinat, ibi incumbamus, frustra enim venitemur, nec nisi nosmet ipsos demergi-

mergimus. Hoc est, quòd hujus seculi moribus me adapto, parùm sollicitus, quid ante me actum, quid post me agendum sit. Exuitur Ecclesia hodie: amovebo & ego laciniam. Dissolvitur Politia: amovebo & ego vinculum. Conturbantur mores: movebo & ego camarinam, expellitur virtus germana: promovebo & ego discessuram: idque planè Fraternitatis illius reformatricis securus. *Refor.* Hic ille est factionis pestilentissimæ primarium membrum, quæ Saluti Publicæ, superiorum conscientiæ, inferiorum fidelitati, prudentum solitudini, fortium robori, religiosorum puritati, eruditorum sapientiæ, optimorum meritis, ingeniosorum patrocinio insidiatur, & quocurq; potest loco, detrahit: è contrà tyrannidi, Hypocrisi, & Sophisticæ fores pandit, ut jã prop. modū nesciamus, quid credamus, cui pareamus, quo ducamur, & maximis suspitiis ad supremam illam orbis Reformationem aspiremus, cujus spem per amplam Fraternitas augustissima fecit: nōdum verò opus ipsum.

exhi.



exhibuit. *Inform.* Beatam Rempub.  
quæ nec privato quorundam comino-  
do corrumpitur cum posteritatis inju-  
ria, nec cerebroforum ratiocinatiuncu-  
lis subinde periclitari cogitur cū præ-  
sentium exagitatione: sed singulis boni  
publici curam insinuat & commendat,  
ac majorum experimentis innititur!  
*Deform.* Quid tu mihi obgannis? ut  
clericos vestros, scribas, cerdones, &  
eiusmodi bruchos potius audiamus,  
quàm Divûm genus. *Reform.* Itane  
nemo cordatus superest, qui hanc lin-  
guæ petulantiam, frontisquæ audaciam  
coherceat? *Inform.* Falleris, quisquis  
torrèntis impetum obstruere conaris:  
hoc potius meditemur, quî moram ali-  
quam in tuto feramus, dùm hæc pa-  
rum duratura aqua se effundat. Interea  
auditores, civis, liberos, & discipulos  
nostros ita informemus, ut Divina ju-  
dicia, quæ vel temerariæ corruptioni,  
vel intempestivæ emendationi, id est,  
vitiosæ & deformationi & reformatio-  
ni, irrogari solent, animadvertant, ve-  
nerentur, & in maximas sive axiomata  
hujus

huius Mundi convertant. *Defor.* Vapulatu, ego feriam: uter citius fatigabitur? *Infor.* Vidi tamen nonnunquam percussorum baculos opinione citius confractos. *Refor.* Non patiar impunè mihi injuriam fieri. *Infor.* At ego rem omnem ad posteritatem integrè deferam, quæ finito servitutis tempore, & restituta libertate habebit, ni fallor, informationi gratias.

## XVII.

*Sciolus, Barbarus, Sapiens.*

**S***ciolus.* Quàm iniquè nobiscum egit hucusq; Philosophia, quæ corticem nobiscum communicavit, nucleum abscondidit: nam quæ verioris sapientiæ sunt, ea nos omnia latuerunt, scilicet Spirituum commercium, Naturæ concentus, signatura rerum, Cabala linguarum, Anatomia creaturarum, opera constellationum, medicina characteristica: & infinita alia, quæ admiranda nostra Fraternitas nobis reduxit, & ab injuria vindicavit.

*Barb.*



*Barb.* Satis, opinor, affligitur Mundus Cicerone, Aristotele, Galeno, Justiniano: nec opus est Mauris, & Arabibus nugatoribus: atq; utinam nec Reuchlinum, nec Erasmus Germania nostra unquam vidisset! haberemus utique sub antiqua simplicitate & rectitudine melius, tutius, expeditius. *Sap.* Vaccam oportet fuisse matrem tuam: ita mugis, hoc potius decebat precari, ut, quæ inchoata est ab iis, literatura perficiatur, & fastigium suum impetret, quæ enim nobis desint, vel unica fraternitatis *Fama* tibi dixerit. *Barb.* Si quid precibus meis daretur, exorarem utiq; rei literariæ interitum, quæ tot nobis labores, tot etiam capitis rationes invexit, ut sub librorum mole deficiamus. *Sciol.* Ad haram, ad haram: neque enim aliter, quàm fœno pascē lus es. *Sap.* Enimvero suos etiam ortus, suosque occasus habent literæ: nam quæ ante seculum renatæ sunt, nescio quàm senescunt, ut jam propemodum delirent. cuius culpam curiosis aliquot debemus, quæ non contenti solidâ aliquâ

quâ eruditione, volatile quid affectant.  
Qui morbus religiosos juxta ac prophanos invasit, ut nescio quàm occultam, lubricam, allegoricam, mysticam, abstractam, harmonicam literaturam affectent, nihil minùs tamè, quàm priscos illos Heroas assequantur. *Sciol.* Si rectè audiui, de literis tibi sermo est. *Sa.* Certè & de literarum corruptoribus, quorum in numerum, est, cur te recenseam. *Sciol.* Corruptorum verò, dum literarū augmenta ut qui maximè appeto, ac procuro? *Sap.* Sanè: verum eā viā, quæ certissimis laqueis, & inevitabilibus tenebris eā involuit. nam quæ tibi occultior philosophia est, ea mihi etiam specus & antrum infernale creditur. *Barb.* Vah quàm literati ipsi sese excolunt, & solantur! *Sa.* Perte nunquā stabit, quo minùs religionis caligo, politiæ tenebræ, historiarū fumi, artiū fuligo, morū nebulæ reducantur, qui in rem preciosissimā, literaturam, es injurius. *Scio.* Hem nihil ne novi habes de *Roseis fratribus*? *Sa.* Hoc habeo, nihil potuisse tui similibus prodire aptius,

C



nihil etiam ad hebetandū illud glorio-  
sulū acumen, certius & convenientius.

## XVIII.

*Aeger, Sanus, Medicus.*

**A**eger. O mi Deus, quā vana est  
Medicinę jactantia, quā teme-  
rarię artis pollicitationes, ut quę tot  
annis me doloribus meis relinquunt,  
neque vel mitigationem, quam undiq;  
spondent, adferunt! Itaq, dum undiq;  
anhelo, spes aliqua ex *Fraternitatis* il-  
lius nova panacę affulget: sed quam  
locus vel sedes ipsius incognita diffici-  
lem reddit: non parcam tamen sumpti-  
bus, dum aliquid certius & salubrius  
impetrem. *San.* Facit molestissimus  
tuus morbus, ut vel pręsente sanita-  
te trepidem, & Fratres illos conqui-  
ram, quorum in manu tam sanitas est,  
quā longęvitas, si subscriptionibus  
credimus: miror tamen duritiem ho-  
minū, in ea pręsertim Christianę cha-  
ritatis jactantiā, qua medicinam suam  
non dicam promiscuę turbę, sed sele-  
ctissimis hominū invident, nec multis  
etiam

etiam singultibus vocati, comparent.  
*Aeger.* Ajunt habere sua oracula, quæ moneant, quibus opem debeant, vel negare possint: dein temporis maturitatem nondum adesse, sive silentij sacri finem. interim ego crucior. *Sa.* Quid autem dicemus, habere ipsos talia ex relatione, an aliqua humanâ indagine impetrasse? quod si enim à Deo habent, licebit & nobis orare: sin industriâ suâ, quid itidē in nobis prohibet, idem tentare? *Aeg.* Ah noli mihi ea tentamina in mentem revocare, quibus ego corpusculum meum hocce substravi! atq; heu nostrum Medicum! *Med.* Benè sit tibi! *Aeg.* Utinam! utinam etiam per te liceat esse! *Med.* Crede mihi, si meo imperio res ageretur, jam dudum abegissem morbum: sed humani corpusculi maior est infelicitas. quàm quæ arte aliqua terrenâ corrigi, vel mitigari etiam interdū possit. Maius enim peccatum, & virulentius venenū est, quàm quod pharmacis cedat: mortis q; imperium fortius, quàm cui manus medica resistat. Itaque non nisi sub Deo natu-



ram adhibemus, quæ uti & ipsa servit,  
ita voluntatem Dei ac consensum ex-  
pectat, atque exequitur, dissentienti ce-  
dit. *Aeg.* Hæc tria effugia sunt, ne quid  
simile Rosicrucianis exhibere cogaris.  
*Med.* Ejice per Deum hanc animo ine-  
ptiam, ut credas his terris datam medi-  
cinam, quæ imperante etiamnum pec-  
cato, & irritato quotidie Deo, tum irra-  
tionabili hominum vita, denique se-  
nescente Mundo mortalium genus de-  
bitis pœnis, & sententiâ Dei eximat,  
& in voluptuarium aliquem paradysum  
restituatur, cùm ne sub flagellis quidem  
simus tractabiles. *San.* Quid agimus?  
*Med.* Tu sanitatem tuam sobriè curato:  
ille morbum sanis consilijs mitigaverit.

## XIX.

*Vagans, Desiderans, Expectans.*

**V**Ag. Quò nunc eam? Fui Franco-  
furti, fui Lucernæ, fui Amstero-  
dami, fui Lipsiæ, fui Rostochij, & quo-  
cunq; jussus sum ire, nec id hominum  
genus fortunatum reperi. *Desid.* Su-  
perlunt itaque ipsæ Fortunatæ Insulæ,  
vel

vel, quod tutius est, Fessa, Damcar, atque ea omnino loca, ubi enatum est hoc miraculum. *Vag.* Hæc facilius dicuntur ac citius, quàm fiunt. quid enim si in proximo sint, nolint tamen videri? quid si videri possint, nolint tamen cognosci? quid si cogniti etiam evanescant. & dispareant? ego cum vitæ periculo trans mare curram? *Desi.* Quod si mica humanitatis ijs inest, nō patientur tot labores, itinera, desideriaque esse frustrata, ne dum nostris capitibus noxia. Certum est autem huius negotio immori. *Vag.* Hæc me una molestia propemodum enecat, quod passim iniquos, passim duos fraternitati, quàm plurimos verò eius contemptores & neglectores reperio, ut jam penè sordidum ac infame, imò & periculosum sit eā inquirere. Dum igitur mussito, dum alij ambiguent respondēt, dū aliqui etiam false rident, perit tempus, deteruntur calcei, disfluunt nummi, crescit hæsitatio. *Exp.* Quem ego hunc hominem dicam? mirum, nī erraticis illis stellis sit, quæ paupertatis



irregulares periodos faciunt. *Vag.* Salutem tibi precor. *Expe.* Tibi sanitatē. *Vag.* Et felicem motum. *Expect.* Ac debitam quietem. *Vag.* Nihil apud vos rari, miri, cari? *Exp.* Certē. Vir sapiens, rarus: vir pius mirus: vir bonus, carus. *Vag.* Non hoc volo: sed annē hęc terra nullos alat Heroas? *Expe.* Si jactantię credimus, plurimos. *Vag.* Non me capis. Non inter vos aliquis Naturę Magister est? *Exp.* Quid ni sit, qui Deum credimus? *Vag.* Nondū mihi accedis. Estne vobis insolitus aliquis artifex? *E.* Utique, ut qui nuper ex fimo fecit aurū. *Vag.* Hem quid ais? hem! *Exp.* Quasi id tuis agricolis incognitum sit. *Vag.* Illudis: sed aurē, quęso, porrige: Nihilne *Crucirofiani* inter vos est? *Expect.* Vah delirum caput, sive potius miseros pedes! qui huic indagationi & conquiſitioni ſerviunt. *Vag.* Nihil tu impendes negotio tam neceſſario, tam maximi fœneris? Nam ſi ſemel impetravero, quod volo, omnis labor, omnis fatigatio abunde adęquata ſunt. *Exp.* Non verò eiſ es patientię, ut domi confi-  
deas,

deas, illosque expectes fratres: sed occurrendum ijs est, etiam eâ viâ, qua fortasse minùs adventuri sunt. *Vag.* Videant meam promptitudinem, & æstiment. *Exp.* Infelicem equidem tuam sortem, qua in terra circumageris, ut nectibi servias ipsi, nec in rem communem aliquid conferas. *Vag.* Id fiet, cùm metam attigero. *Expect.* Eam scilicet, quæ in circulo est, atq; ibi incipit, ubi definit.

## XX.

*Atheus, Superstitiosus,  
Christianus.*

**A***Theus.* Enimverò terriculamentorum nobis satis fecit Religio, quæ fascino veluti homines, quoquo vult, trahit, ut jam parùm opus habeamus Rosaceis illis fratribus, quî novas fabulas adferunt. *Superst.* Semper mihi ea spes animo sedit, fore, ut iterum redeamus ad illam virtutem miraculosam, quæ hoc tempore defecisse visa est. hanc si nobis restituunt, uti palàm exempla in medio sunt, pœnitebit te,



quod scio, petulantia tua, vel temeritatis, qua omnem religionis reverentiam elevas. *Ath.* Quin imò laudo tuam meticulositatem, qua unius speciosi commenti horrore ad quodvis servitium adigeris, ita ut vel pictum cœlum omni cultu ambias, pictumque infernum quovis lytro effugias. *Superst.* Ecquis verò eius sit impudentia, cum viderit Naturam superari, & è cœlo quasi res sacras & stupendas demitti, fortuitum aliquid & planè humanum dicere ausit? quod quia in fratribus hisce frequentissimum est, quis non colat & veneretur eos, quos constat creaturis omnibus dominari, vires possidere naturales & præternaturales omnes, amicos bonorum, hostes malorum spirituum esse, atque revera hominis in terra Monarchiam occupasse? *Ath.* Quàm tu suaviter nugaris, velut ex Elysijs campis cum Ænea, aut è Paradiso cum Mahomete reversus! *Christ.* Quid huic homini cum Mahomete rei est? *Superst.* Placet adventus tuus, ut huic mecum impietatem in Sanctos  
Rose-

Rosecrucios exprobres. *Christ.* Appage mihi Sanctos novos crees, qui vix Pontificios illos relegavimus. *Ath.* Ha ha he? habes, quod voluisti? *Chr.* Non minus tamen verè sanctos in cœlis honorabimus, & vitâ nostrâ, quantum licebit, æmulabimur. *Ath.* Ergo aliqui tibi Sanctuli supersunt? *Chr.* Ac ille Sanctus Sanctorum maximè, qui cor tuū & subinde ferit, & oculos tuos stringit, & conscientiam pungit, quicquid dissimules, aliquando hoc impurum os comminuturus. *Ath.* Valde minaris. *Chr.* Imò cœlum & terra minas suas contra te habent, quas nō effugies, nisi resipiscas. *Ath.* Mirum, nî frater Rosecrucianus sis, cœlorū terrarumq; conscius & particeps. *Chr.* Valeant illæ nugæ, & quicquid à Dei Verbo ad curiositatis ambages abducit. *Sup.* Imò hoc verbū urgent, & divino planè modo explicant. *Chr.* Nihil huius rei nisi mera jactantia lucē vidit, dum interea varij & diuersi histriones maximâ temeritate & religioni, & rei Christianæ monstrosissimâ pietate, verius impie-



tate certissimâ illudunt. *Su.* Weigelianostu intelligis. *Christ.* Viderint, quicunq; ecstases, separationes, abstractionesq; somniant, qui miris phrasibus omnes Fidei articulos turbant, qui horrendas opiniones sine ullo Dei testimonio obtrudunt, qui è centro ad omnes scientias se egredi jactitant, qui in omnes bonos & fideles Dei sunt maledici, quomodo suæ primum conscientia, dein Dei judicio satisfaciant.

## XXI.

*Decoctor, Avarus, Frugalis.*

**D***Ecoct.* Jam exaruerat voluptatû mearû fons, & lurida illa ossæq; pauperies, cumq; pauperie infamia, cumq; infamialabor, cumq; labore dolor, & quæ alijs maleferiati comites ingratißima quæque minitati fuerant, & ecce! euge Fratres opulentissimi adveniunt, quibus exiguum est, me in integrum restituere. *Avar.* Tuné ausis fratrum expectare opem, quos ne Deus quidem siverit tam pertuso & diffluente dolio quicquam infundere?

dere? Ego verò qui rei domesticæ angustia coarctatus, perenni labore meâ infelicitatem sustinui, & reculas aliquas contra fortunæ iram vel perfidiam collegi, magna confidentia Fratres expecto, qui parsimoniæ meæ feliciter aliquando aspirent. *Dec.* Nunquam inclementius egerint, quàm si quicquam opibus tuis addant. quò enim plus habebis, eò indigebis amplius, eò esuries sitiesque amplius, eò premeris & cruciaberis amplius, eò te abscondes ab omni hominum usu & jucunditate profundius. Ego verò, qui universitate hominum me natum credo, idago, ne quid unquam in manus incidat meas, quod non Reipublicæ sit vel fiat commune: unde amicorum & sociorum maiores mihi turmæ sunt, quàm tibi domestici. *Frug.* Omen esse dixero, quod simul in prodigum & tenacem incido. *Decoct.* Evax, commilito, quò imus, ut bibamus? *Fr.* Ergò ne nummus tibi superest? *Dec.* Integri thesauri. Præterquam enim quod prædictum mihi est, fore, ut hu-



ius Euclionis bona omnia mihi cedant.

*Avar.* Patibulum, laqueus, corvi. *Dec.*

Fraternitas illa Crassi, Cræsi, Chryseæ

spem certam fecit aliquot talentorum

vel minarum, vel unciarū optimi pro-

batissimi auri. *Frug.* Varius es, ut mi-

nus de tuā futurā opulentiā sperem?

quin potius delegatā tuā perfusione id

impetras quòd te convenienter nutriat,

decenter vestiat? *Decoct.* Laborando?

quod nolum. *Frug.* Orando, labora-

do, conservando, partiendo, ornando.

*Decoct.* Nunquam in hoc ludo sum e-

doctus. *Avar.* Quin tu hunc despe-

ratum negligis? *Frug.* Nescio, uter

è vobis deterior, tu certè videris infeli-

cior. *Avar.* Ego, qui res meas ago,

atque augeo? *Frug.* Ita tamen, ut

semper egeas, etiam conscientiā, & bo-

nā mente. *Decoct.* Bibamus. *Frug.*

Vivamus. *Avar.* Habeamus. *Frug.*

Certè ut ille nunquam vult vivere, ita

hic nunquam mori. *Decoct.* Vivam,

cū Fraternitatis convictor ero. *Avar.*

At ego eorum liberalitate opes meas

termino. *Frug.* O Insanos, qui ab ullo

alio

alio homine dubij expectatis, quod à vobis certissimè impetraretis. nam sub frugalitate nihil vitæ compositæ deesset, nihil superesset etiā luxuriæ, quàm vobis suadebunt illi fratres vestri, si frugi sunt.

## XXII.

*Assentiens, Philautus, Contentus.*

**A**ssent. Quàm unquam referemus satis dignā gratiam ijs, quorū instructione oculos in hoc theatro mundi circumferimus eruditos, rationabiles, methodicos, ut sciamus & dijudicemus, quicquid in his terris nobis voluerit Deus conceditū. *Phil.* Si quid ego debeo, Naturæ debeo, quæ sine alio magistro me ad sua penetralia indolis felicitate & sagacitate intromisit. Nā cū se altius semper ferret, aut profundius demergeret etiam meū ingeniū, quàm paedagogorū hebetudo viā facere posset, factū esse opinor, ut Fraternitati illi placuerim, quæ & humanissimis literis me ad se invitat, & arcanorum omnium



communicationem sponte offert. *Aff.*  
Itane tu credis, superesse abstrusius ali-  
quid, magisve reconditum, quàm Præ-  
ceptores nostri eruerunt? *Philau.* Vah  
simplicem hominē! qui nescis, quàm  
illi homunciones supremum tantum  
corticem sepultæ veritatis dilexerint:  
nobis verò, ad hanc seculi felicitatem  
natis ipsas fibras & medullam omniū  
artium disciplinarumq; ressecandas &  
introspectandam reliquerint. cuius rei  
exemplum septem nova mundi mira-  
cula habes, quantū intersit cælum ter-  
ræ jungere, ut incredibilia perpetren-  
tur. *Con.* Omnes morbos si non sana-  
biles, certè tolerabiles præ philautia  
crediderim, quæ vnà minùs medici-  
nam patitur, quàm phrenitis: sibi verò  
relicta omnia obiecta & subiecta infi-  
cit, & maximam stragem. Sed hem ne  
quid in propinquo sit. *Phil.* Jam dudū  
Mundi nostri errores & incommoda  
consignaverā, & media ipse meditatus  
erā rebus accommoda, etiam antequā  
fraternitatis fama exaudita est: nunc  
tamen nihil impedio, etiā suam senten-  
tiam

tiam aperiant, quā præsagio non multum a mea mente abfuturā, ut quæ eodē regatur, dirigaturvé spiritu. *Aff.* Non capio tua magnifica verba. *Con.* Ego tamen conjicio hunc, ex ijs esse, qui media literaturā, & mediocri ingenio, intermixtis etiam somniis aliquos rerum humanarum naves aggreditur; quos tamen nec planè intelligit, nec ullā parte sublevare potest, ex eorum numero medicus, quorum pharmaca sunt acerbiora morbis quorumque inanis loquacitas ægro caput afflictum amplius turbat. *Phil.* Hic etiam mihi annotandus. *Cont.* Quæso his notis me consigna: Esse hominē, qui longā experiētiā didicerit, pluresq; rerum nostrarum examinatores ita sapere, ut si corrigendæ ipsis committerentur, futuræ sint adhuc longè deteriores.

## XXIII.

*Spermologus, Mataeologus,  
Theologus.*

**S***permol.* Quisquis dixit Mundum  
agere histrioniam, rectissimè dixit.  
nam



nam tragico apparatu, & verborum co-  
thurnis omnia foris constant: intra au-  
læa omnia neglecta, confusa solutaque  
sunt: ita ut mihi interdum à risu vix  
temperē, cum homines terrefaciendū  
sunt. nam quā dicam me missum, cum  
ipse cucurrerim? quā insector Mundū,  
quem colo? quā maledicam ventri, cui  
servio? quā aurum contemnam, quod  
vitā charius? quā crucē & mortē com-  
mendem, à quibus abhorreo? quā cæ-  
lum pandam, cum quo nihil est com-  
mune? & tamen verborum ea est vis,  
ut, quod vident mihi displicere, aliis  
persuadeam: quod placere mihi con-  
spicuum est, alijs invisum reddā. *Mat.*  
Mirum est hoc politissimo seculo tole-  
rari etiamnū simplicem Theologiam,  
quæ nō nisi in litera haret, spiritus ve-  
rò nihil degustat, nihil ad mystica in-  
volucra penetrat. Utinam verò Orige-  
nes aliquis nobis redderetur, qui tripli-  
cem Scripturæ sensum nobis aperiret,  
& tabernaculi vela detraheret, vel sigil-  
la libri clausi referaret! tum demum sa-  
cras literas legere juvaret. *Sp.* Tūc il-  
le, qui

le, qui mera nox es? *M.* Tūne ille, qui  
mera vox es? *S.* Tūne ille divinator? *M.*  
Tūne ille imitator? *Th.* Quān similes  
habent labra lactucas! Benignissime  
Christe, quān periculū sū est sub mer-  
cenario, & fanatico vivere! nam dum  
alter quam emit, stationem varia levi-  
tate deturpat; alter, quæ habet, omnia,  
simplici veritati supponit, infelix grex  
semper habet, quæ doleat, desideret,  
hæsitet. *Sp.* En nostrum Censorem, no-  
strum criticum, quem si sequimur, ho-  
nores obscuritate, vinum aquā, volu-  
ptatem cruce commutamus. *M.* Con-  
donandus hic ei error est. Peccat enim  
simplicitate, ne quid ruditatis insimu-  
lem. *Th.* Placet iudicium, ac, ut simplici-  
tatis custos sim perpetuus, Christū oro,  
at vos dum duplici animo, ore Deum,  
corde mundum, linguā Christum, ma-  
nu Mammona, vultu ovem, ventre lu-  
pum refertis, dum charta spiritū, sparta  
irritum, voce flamen, prece flumē, ver-  
bis apes, herbis dapes appetitis, nullo  
dubio fraternitatis illius signum ex-  
citastis, vel certē ad auxistis, cū Eccle-  
sia.



sia à vobis aggravata facilius audiat, si qui compositiorem vitam, & sanctiora verba promittant. Hinc vulgus inter scandala & nugas medius aures pandit, ac ineptissima quæque, ne dicam periculosa & noxia intromittit: hinc conscientiosi vos linquentes nusquam satis tutò consistunt: hinc cordati vobis contradicentes alibi involvuntur: hinc sagaciores à vobis circumducti, rerum universitati diffident: hinc servi Christi à vobis exagitati, nisi Spiritu Dei identidem roborentur, colliquescent.

## XXIII.

*Politicus, Tyrannus, Rex.*

**P**olit. Cùm nullum sit animal homine lubricius, nullum etiam vinculis constringitur difficilius, aut continetur. Vnde qui nescit ex omni subiecto facere nodum, aut catenæ illius Politicæ articulum, frustra homines tractare in animum inducit: at qui Regulam *rationis status* probè tenet, & per omnia exèpla dextrè adhibet, is demum mortalibus imperat. Ty. Eho, an nescis,  
vim

vim & minas satis esse ad frenandos, quantumvis indomitos, populos, ut contra Potentis rerum voluntatem & nutū nemo hiscere audeat: sed ad præceptum & iniunctum omnes se inclinent atq; accommodent. *Polit.* Haud equidē satis est violenter homines invitos cogere, qui facilē alicubi erumpunt, ac patientiam lasam in furorem convertunt, nisi artes adsint blandæ, ac velut poppy smata, quæ generosas naturas refrigerare queant. *Rex.* Quò mediutius Deus sub imperij habenis exercet, eò plus video opus esse cœlesti adiutorio, pervigili curâ, religiosâ, prudetiâ, humanitate Christianâ, modestiâ philosophicâ, temperantiâ civili, atq; omnino supremi Numinis æmulatione. Nā cum tot tantaq; hominibus insint dubitandi, hæsitandi, reprehendēdi, mutandi, indagandi, expectandi, repugnandi, ludendi, conquerendi, objecta, tam ampla dissentendi materia adsit, qualia unicum Fraternitatis nescio cuius figmentum elicuit: supra hominem sit oportet, qui perfectè homines regat, quod



quod sanè nec Politicus aliquis vertu-  
mnus, nec violētus aliquis exactor im-  
petrabit, cū illum Deus rideat. hunc  
habeat exosum, utrumque eludat &  
præcipiet. Sed qui vero in Deum cul-  
tu, vero in homines amore, verâ apud  
se tranquillitate: sed omnino S. Spiri-  
tus afflatu ita hominibus officia distri-  
buit, ita officia exigit, ita officia tempe-  
rat, ut maxima pars subjectorū Christo  
lucrifiat, de reliquo commodè & ra-  
tionabiliter habeat ac vivat: sed etiam  
ingenio linguaque ita utatur, ne quid  
exorbitent quidem petulantes: necta-  
men sub minis & carceribus murmu-  
rare, mussitare, sibilare, nutare, aut  
quovis alio occulto modo dolorem suū  
justum, rei quæ indignitatem atque tur-  
pitudinem explicare, delineare, effin-  
gere & circumscribere habeant neces-  
se. Ita nobis Deus det vera, bona, sana,  
rationabilia! falsa verò, fucata, frivola,  
vana, impura, improba, noxia no-  
stris finibus quàm remotissi-  
mè arceat!

## XXV.

*Fama, Obstinatus, Resipiscens.*

**F**ama. Satis superq; hominibus illusum est, liberemus tandem constrictos, confirmemus fluctuantes, erigamus lapsos, revocemus transversos, sanemus morbosos. Ehem, Mortales! nihil est, quod *Fraternitatem* expectetis: *fabula* peracta est. *Fama* destruxit: fama destruxit. *Fama* agebat: fama negat, quicunq; estis, sive *curiosi*, sive *supini*, sive *scrupulosi*, sive *securi*: sive *mobiles*, sive *immobiles*: sive *Astrologi*, sive *Calculatores*: sive *queruli*, sive *defensores*: sive *ciniflones*, sive *Agyria*: sive *mendici*, sive *impostores*: sive *hypocrita*, sive *impj*: sive *Scriptores*, sive *Leitores*: sive *otiosi*, sive *laboriosi*: sive *faciles*, sive *difficiles*, sive *admiratores*, sive *contemptores*: sive *creduli*, sive *suspicientes*: sive *audientes*, sive *videntes*: sive *deformatores*, sive *reformatores*: sive *scioli*, sive *barbari*: sive *agri*, sive *sanii*: sive *vagantes*, sive *desiderantes*: sive *atheii*, sive *superstitiosi*: sive *decoctores*, sive *avarii*: sive *assentientes*, sive *Philauti*: sive *spermologi*, sive *Matologi*: sive *Politici*, sive *tyranni*: sive *obstinati*, sive *Resipiscientes*, quæ res bene vertat, mihi & vobis, spectatores, plaudite. *Ob.* Abiit illa: nos quid agimus? *Resp.* Quid, nisi posthac sapiemus, quotquot turpiter desipuimus. *Obst.* Siccine tot speciosa & verisimilia verba nihili sunt? *Res.* Ita *fama* ait. *Ob.* Siccine hæc



hæc devotio & modestia imposuerit? *Res.* Ita fama ait. *Ob.* Siccine tot testes & abstructores fide digni fefellerint? *Res.* Ita fama ait. *Ob.* Siccine tot nasutissimi sint decepti? *Res.* Ita fama ait. *Ob.* Nihil agis, ô fama revocans, quæ id agis, ut speratam felicitatem mihi eripias: quin inò verberibus, ne dum verbis me haud abiges. *Re.* Nescio, quàm me fama totum immutavit, ut eijcere hanc animo expectationē incipiam: hæc tamen una cura me coquit, quòd nō bene & accuratè distingui inter ea scripta, quæ fraternitatis nomine prodire, suspicor. Sunt enim aliqua palàm ludicra, aliqua intricata, aliqua nequā, aliqua subdola, aliqua tamē pia & devota: omnia literaturā aliquam nonnulla summam, unū alterūve apertam imposturā, redolentia: quæ quisq; confundit, aut eiusdem genij æstimat, nullo dubio fallitur. Sic enim probaretur Mundus, rejiceretur Christus; laudaretur vanitas, culparetur soliditas; æstimeretur impostura, negligeretur ratio; ornaretur mendacium, despiceretur veritas. Itaque ut fraternitatis ipsam societatem quidem mitto, nunquam tamen veram *Christianam fraternitatem*, quæ *sub Cruce Rosas* olet, & à mundi inquinamentis, confusionibus, deliriis, vanitatibusq; se quàm longissimè segregat, dimisero; sed ad eam cum quovis pio, cordato, & sagace ineundam aspiro. *Obst.* Nemo mihi persuadeat, hanc societatem nō summis donis ornata, optimis legibus constitutam, felicifunis

simis opibus firmatam esse ut nihil opus sit, nos jejunam aliquam & debilem, tentare. *Res.* Vivamus sub Christo, qui satis abunde nobis præscripsit quid Deo placeat, animæq; expediat. Intercà miremur 1. humani ingenij infinitatem, quod ausus, conatusq; habet innumerabiles: 2. occultam mortaliū renitentia, quæ sub acquiescentiæ involucro latitat, rodit, atq; per varias rimas exitum tentat: 3. curiositatis temeritatem, quæ ad quævis incognita, si præconium adfit, semet offert: 4. calamitatis impudentiā, qui dissimulato habitu nihil non effudit, & impunitatis spe planissimè bachatur: 5. otij pericula, sub quo animus varijs ineptijs ac fabulis occupatur, & à humanitatis verò officio abstrahitur: 6. paupertatis etiam inventiones, quibus, se fami & infamiæ opponit, ac ad præcipitia usq; semet adigit: 7. intempestivum quorundam Zelum, vel præco- cem etiam ingenij ostentationē, qui incognita etiam non sine ludibrio suo judicare conatur: 8. hominum nobilitatem, quibus faciliè consueta sordent, & nova quantumvis monstruosa, arriident: 9. Nugarum rerumq; vilissimarum incrementa, quæ scintillam in maximum incendium convertere possunt: 10. judiciorum de rebus nostris multiplicem dissensum etiam inter eos, qui maximè sub eadem Religione & Politia, imò sub ijdem regulis consentire videntur: 11. Artium & scientiarum in multis exilitatem, quos vulgus summos Sophos arbi-  
tratur.



72 TURRIS BABEL.

tratur: 12. Reformationum quàm plurimarum inanitatem, quæ verbis potius, quàm opere constant: 13. Veritatis cū opinione conflictum, eiusdemq; sub sagacitate passionem sub simplicitate victoriam: 14. maximè confidentiæ lubricitatem, & rerum in Mundo prægrandium debile fundamentum: 15. bonitatis & rectitudinis apud quàm plurimos igniculos, qui sub consuetudinibus quasi sepulti latent: 16. Societatis humanæ vulneri opinione potius, quàm necessitate constantia: 17. Regni Christiani paradoxa, rebus & moribus mundi toto cælo contraria, & si quæ alia in mentem venient, quæ, dum hæc Comœdia agitur, observare licet. *Ob.* Certus sum operiri *Fratres*, & iudicium de ijs meum suspendere, aliorum negligere. *Res.* At ego, si sint, sive nō sint, dum nō esse magis suspicor, ut ipse sim *Christi* & optimi cuiusq; Christiani *Frater*, contendā: Religionē colā *Christi* Politiam reverebor *Christi*: Scientiam amabo *Christiani*: mores amplectar *Christianos*: rosis persuar *Christianorum*: *Crucem* ferar *Christianorum*: *Ordinem* tu bor *Christianitatis*: disciplinæ parebor *Christianitatis*: vivam *Christianus*, moriar *Christianus*, eritō; ut cum ijs loquar:

IESVS MIHI OMNIA.

